Et examinato de plano fe' notar a Hironimo Dedo secretario dil Consejo di X 4 sfogii di carta dil suo constituto, et li fo dito restasse a palazzo dove era prima con li soi fameglii.

Di Spagna, fo letere di sier Gasparo Contarini orator nostro, da Burgos, a dì 18, 23 et 25 Mazo. Come il Re, zoè l'Imperador feva preparation di guerra aziò il re d'Ingalterra volesse far passar le zente a danni dil re di Franza. Item, come monsignor di la Rochia doveva partir per-Italia; et che la Cesarea Maestà havia scrito in Italia zerca il ducha di Barbon passar su la Franza, che l'andasse, tutta via inteso che 'l re d'Ingalterra havesse mandà exercito di quà. Scrive come era zonto letere de Italia con l'aviso del partir di francesi de Italia, et fo da la Cesarea Maestà, qual molto ringratiò la Signoria di le operation fate, laudando molto il ducha d' Urbin governador nostro. Item, scrive di certa nova venuta per letere di Lisbona: dil zonzer di una caravella li venuta de India, qual è stata in l'isola di Jochatan et à portato 60 milia pexi d'oro; che cadaun pexo val ducati 1 e mezo, sì come nel capitolo di le letere si contien. Scrive, monsignor di la Rochia partì a di 18 per Italia, non con quella autorità veniva il Gran canzelier; è con lui il conte Hironimo Nogarola, al qual è stà dà ducati 200 et scrito a Napoli li dagi ducati 2000 per maridar una so fia.

Di Bergamo, di sier Marco Antonio Venier el dotor, va ambassador a Milan, di 17. Come era venuto lì, perchè stando a Ponte san Piero dove l'era, veniva milanesi di Milan, dove si moriva assa' di peste et non si poteva vardar. Però era venuto li in Bergamo et havia hauto letere dil signor Ducha, da Monza, che li scrivea non si dovesse mover perché ancora non havia deliberà dil loco di andar; qual andato aviserà. In questo mezo, se l'acaderà qual cossa manderà per lui, et cussì acadendo a lui Orator esser con lui potrà venir a trovarlo; sichè starà lì a Bergamo.

Vene sier Hironimo da Canal di sier Bernardin, 245 ' venuto Proveditor zeneral in Dalmatia, vestito damaschin negro acompagnato da parenti, ma non era suo padre per non andar di soto dil fiol; et referite in Collegio di quelle occorentie di Dalmatia. Il Principe laudô si facesse provision per conservar quella provincia.

Da poi disnar, fo Pregadi, acciò sier Piero da chà da Pexaro procurator venuto Proveditor zeneral di campo referissa: et leto le lettere sopraditte.

Di sier Piero Bragadin baylo a Constantinopoli, date a dì 20 Mazo. Scrive le nove ho scrito di Alexandria, haute et scrite di sopra. El come il Sophì si dice vien in el paese de . . . molto potente; qual venendo, seguirà de lui che la sua testa sarà portata qui come è stà quella di Achmet, per la potentia di questo Gran Signor. Item, Aias si ha dolesto è stà dà aiuto a quelli di Clissa; l' Orator era presente, qual difese; disse volea mandar uno homo a saper, e trovarse con lui. Scrive esser stà a la Porta et haver basà la man al Signor, et haver ditto che 'l vol mantenir la paxe etc., ut in litteris. Scrive, il diamante è stà venduto per ducati 25 milia d'oro, in oro; che se lui l' havesse hauto l'aria venduto ducati 50 milia, zoè 25 milia a scontar nel tributo di Cypri et 25 milia haria hauto contadi.

Noto. Dito diamante fo comprà di la Signoria per li sotoscriti, a darli contadi ducati 6000 et a Constantinopoli 6000 vendendolo, et non lo vendendo darlo indrio et haver li ducati 6000 indrio in anni Li caratadori fono sier Zacaria Trivixan qu. sier Nicolò qu. sier Tomà procurator charati 8, sier Lorenzo Falier e figlio qu. sier Tomà 6, sier Zuan Andrea Badoer di sier Hironimo 6. Si dice, in questo participa sier Francesco Corner el cavalier procurator 2, sier Francesco Zen di sier Piero 2, zoielieri, sichè 24 carati è partidi in questo modo.

Di Franza, di sier Zuan Badoer dotor e cavalier, orator, date a Paris a di 10 April, qual fo lecte, et lui era venuto in Pregadi vestito di veludo negro, che fo bel udir letere presente lui. Il qual serivea: come, essendo venuto il Christianissimo re di Picardia a san Dionisi per parlar con lo arziepiscopo di Capua nontio pontificio, esso Orator have muodo di parlar con Soa Maestà e li richiese licentia; el qual disse che 'l non si partisse, et che 'l non haveva guerra con la Signoria.

Fu posto, per li Consieri, che atento Piero da Como citadin di Vicenza habbi dato a livello al monastero di san Stefano di Padoa certe terre a livello in villa de Camisan per ducati 40 a l'anno di livelo, ut patet, che per questo Conseio la ditta alivelation sia confirmata. 105, 2, 16.

Fu posto, per li Consieri, Cai di XL e Savii, che 246 al reverendo frate di s. Francesco vardian, et altri frati qual va vardian in Jerusalem, li sia concesso amore Dei il dazio di peze 22 charisee, peza una e meza di scarlato, 10 peze di formaio, salumi, uno baril di chiodi, uno mier di ferro et 10 barille de vin, ut in parte. Fu presa. Ave: 164, 16, 0.